

Straot versieren & en oonze reputaotie.

Wij woont al sinds 1989 an de Boskamp en doet dus ok al jaoren met an 't straotversieren in de weke van Ronermark.

Sinds 2021 is dat niet meer allent met lampies en vlaggies, maor het is de bedoeling dat wij zölf wat maakt.

De buurtcommissie van 2021 (lees Coby&Ellen) haar de hiele Boskamp opdield in blokken van 8 huuzen en met dat stukkie mussen ie vorm geven an joen stukkie van de stroate. 'Wij' hadden Duutslaand'. Ieder huusholden kreeg een groot canvasdoek da'j zölf mussen versieren.

Wij neudigden iederiene van oons blok van 8 uut bij oons in de tune veur een körte brainstorm met as thema 'Wat gaot wij doen?' .

Een beetie onwennig stunnen we met mekaar an de koffie met bastognekoeken. Twee relatief neie buurmänner van de 2 huuzen tegenover oons hadden wij nog niet vake spreuken, wij wussen nog niet iens heur veurnaam.....Erik en Frank dus. Het ies was al snel breuken. Overbuurman Harjo haar een notitieboekie metnummen en maakte notulen van de ideeën die veurbij kwamen.

"Bierstube! Oktoberfest! Biergarten!"

Eehm.....wij moet wel een beetie um oonze reputaotie denken, jonges.

"Wintersport met apres-ski, Weihnachtsmarkt!"

Ok allemaol dinge waarbij de alcohol riekelijk vloeit.....

Maar gelukkig, der kwamen ok aandere onderwarpen veurbij.

Bratwurst, BMW, Volkswagen; Gerard nuumde allent maor een jaortal: 1974.

"Wat hef dat met Duutslaand te maken?"

De buurman die dizze vraoge stelde is geboren in 1975....die hef dat trauma dus niet metmaakt.

Wij kwamen der met mekaar wel uut; wij gungen op zuuk naor een voetbaldoel.

Op de woensdag veur Ronermark was het een drokte van belang in de Boskamp. Iederiene was drok bezig: tuun versieren, verlichting anleggen en commentaar leveren op de aandere tuunen. Wij maakten ondertussen kennis met de bewoners van de neie huuzen verderop in de Boskamp.

Rond 22.30 uur was het slim gezellig bij Dick en Stien op nummer 51. Heur blok had Italië en zij hadden de toren van Pisa met een terras!

Van buurvrouw Ineke mussen wij allemaol even een 'Flügel' drinken, want die flessies haar ze neudig veur in heur ski-hut.

Gezellig ja! Veur het eerst stunnen wij nou met alle burenen van het leste stuk van de Boskamp bij mekaar. En wij wunnen dat jaor ok nog de straotpries!

Maor met de saamheurigheid in onze buurt en de onverwachte gezelligheid met de hiele groep op het terras bij de toren van Pisa hadden wij de heufdpries eigenlijk al!

Nou is het september 2023.

In oonze garage stiet een grote aap en ok twee papegaaien van holt.

De Boskamp wordt een jungle dit jaor! Ko'j ok kieken?